

En pia memoria da

N. 100 17.12.1976

P. Pellegrino Decurtins, franciscan, Ligiaun



(Corr.). Da s. Clau, cun l'alva della damaun, banduna P. Pellegrino en tutta tgeuadad quei mund terrester per entrar ella gloria celestia. Sia mort anetga ha fatg surstar, regurdond quella al vegl verdict «Repentina mors, sacerdotum sors», la mort anetga seigi la sort dil sacerdot. En tgeuadad, ella retratgadad ei nies pader entraus en quest mund, el sul d'Advent banduna el puspei quel.

La gievgia dalla jamna vargada eis el vegnius surdaus al tratsch benediu da sia pleiv nativa a Sedrun, circumdaus dad ina honorada retscha da confrars claustrals e buca meins honoraus dal clerus e dal pievel de sia patria. Sia sepultura festiva encorunescha l'ovra dil bien pader, dat perdetga della gronda simpatia ch'el gudeva el ravugl da siu pievel romontsch, marca cun letras d'aur las bunas ovras, prestadas en nossas pleivs.

Ei drova temps...

Bein fuva il schiern per la clamada sacerdotala daditg tschentaus en siu cor giuvenil entras l'atmosfera, igl ambient ded ina buna famiglia cristiana a Bugnei, nua che P. Pellegrino (Sep Antoni) ei naschius igl onn 1912. Mo la greva damonda era quella: Co far, co sestelleigiar? Ha il Segner denton mess siu maun sin in giuven carstgaun, ha el elegiu quel dalla roscha dil pievel de Diu, lu anfla el vias e sendas, mauns e cors, che pon facilitar quella stentusa via agl altar dil Segner.

P. Pellegrino sto ira da buob per las alps entuorn sco pastur, gie sco pastur conscienzis, pertgei in tal eis el adina staus duront sia entira veta. Finalmein ughegia el ded exprimer siu giavisch, mo las finanzas fuvan buca avon maun. El va a Ligiaun, entscheiva ina bufatga carriera sco emploiau da hotels. Tgi sa con ch'el ura en uras libras per siu futur ideal. Ina caussa ha el cultivau en siu cor: Il bien humor.

Ed el ughegia, bunamein en fuorma humoristica

d'entscheiver siu studi de latin a Ligiaun tier ils Salesians, e quei mo per emprova. Ei va, ei va buca schi bein, eis el buca schi giuvens pli. Ei sedi ch'il studi dil carschii seigi pli serius, mo pli stentus. El tegn la dira. Da leu va el giu ell'Italia e continuescha il gimnasi en ina claustra franciscana, fa siu examen final e sa s'immatricular a Friburg sco frater franciscan. Igl onn 1944, per la fiesta d'Anceinza, vegn P. Pellegrino ordinatus spiritual, celebrescha sia s. Messa nuviala a Sedrun per la fiesta dell'Assumption de Maria ed entscheiva sia veta monastica e sacerdotala plein curascha. Buca mo ils buns talents d'in carstgaun dicteschan siu futur, bein era las qualitads de siu cor, sia pietusadad e sia exactedad de clamada.

Siu operar sacerdotal

Quel ei mo per part enconuschents a nus, perquei che P. Pellegrino ha era pastorau ordeifer ils confins svizzers cun dietas, triduum, missiuns ed occasiuns festivas. El ei staus in fideivel conventual a Friburg, a Hergiswil, en Subsilvania, nua ch'el substitueva beinduras il vicari della pleiv, lu sill'insla verda sper Stein al Rein. Da leu anora, sco era aunc da Ligiaun anora ha el pastorau liung temps la missiun taliana a Turitg. Il pli bugen eis el staus a Blizuna, destinaus sco confessur alla Madonna della Grazie. Era surveva gliez clima per lunsch ora meglier ch'il suffel criu dil lag Bodan. Ils davos onns denton eis el puspei returnaus a Ligiaun, nua ch'el ha per temps pastorau la pleiv tudestga, la pleiv de s. Roc, damaneivel della Madonna di Loreto, sia claustra. Il tudestg ha denton adina caschunau ad el difficultads, demai ch'el haveva fatg tuts ses studis ella «lingua di Dante» e perquei vesev'ins buca adina ses talents sin la tribuna glischonta.

Tgei ha P. Pellegrino fatg per nus Romontsch?

Igl ei strusch ina pleiv sursilvana, nua che P. Pellegrino havess buca pastorau. Pliras gadas ha el supriu provisuras pli liungas, outras gadas ha el gidau ses confrars en temps de vacanzas. El «Casti de Schleuin» eis el staus biars onns catechet ed in pietus spiritual per quels giuvens carstgauns. Las soras stimavan el. Siu humor era sco fatgs per glieud giuvna, ed el scheva savens: Pertgei adina esser trests? Nus essan affons de Diu e quintein cun gl'agid de Diu e cun la futura levada gloriusa. Lein derasar quei spért cristian en nies contuorn. Quei ei bein era stau il motiv, che tons fideivels ord nossas pleivs, dalunsch e damaneivel han dau ad el la davosa honur cun cumpignar sias restonzas terrestras alla fossa. Igl ei buca stau mo ina fenta, sche msgr. uestg ha schau exprimer siu engraziament sur fossa per la lavour, prestada per siu uestgiu, cheu ed ella Bassa.

Gia la stad vargada haveva la maligna malsogna della circulazion dil saung donnegiada tschaffau igl um robust. Il cor ha buca purtau la peisa dil bien pastur, e suenter cuorta ed anetga maldispistadad ei P. Pellegrino ius tier Niessegner. Nus salvein quei bien, humiliteivel e sincer survient dil Segner en pia e buna memoria e schein ad el sur fossa: Dieus paghi!